

**POZIV NA JAVNE KONSULTACIJE
O PREDNACRTU ODLUKE O USPOSTAVLJANJU KRITERIJA I DODJELI
PRIZNANJA ZA ISELJENIKE I ORGANIZACIJE ISELJENIŠTVA
IZ BOSNE I HERCEGOVINE**

Ministarstvo za ljudska prava i izbjeglice Bosne i Hercegovine (u daljem tekstu: Ministarstvo) je, u skladu sa članom 7. Pravila za konsultacije u izradi pravnih propisa („Službeni glasnik BiH“, broj: 5/17), otvorilo proces javnih konsultacija o prednacrtu Odluke o uspostavljanju kriterija i dodjeli priznanja za iseljenike i organizacije iseljeničtva iz Bosne i Hercegovine.

Ministarstvo je pripremllo prednacrt Odluke o uspostavljanju kriterija i dodjeli priznanja za iseljenike i organizacije iseljeničtva iz Bosne i Hercegovine na osnovu tačke 3.5. Politike o saradnji sa iseljeničtvom u kojoj je navedeno da su zemlje s brojnim iseljeničtvom ustanovile nagrade ili priznanja za različite doprinose iz iseljeničtva, da se predlaže da se razmotri slično uspostavljanje i u Bosni i Hercegovini, da se priznaju iseljenici kao važni faktori razvoja Bosne i Hercegovine, da bi se priznanja mogla dodjeljivati pojedincima i organizacijama za istaknuti angažman u određenoj oblasti, i to za zasluge/doprinose razvoju i promociji BiH, razvoju nauke, učenju maternjih jezika, prenošenju znanja ili općenito razvoju saradnje posebno ekonomske između iseljeničtva i BiH, te da će se isto regulisati posebnim propisom.

Razlog donošenja ove Odluke proizilazi i iz činjenice da je iseljeničtvo Bosne i Hercegovine brojno (oko 2 miliona) i kao takvo predstavlja veliki ljudski, ekonomski i socijalni potencijal za razvoj BiH.

Priznanje istaknutim pojedincima u iseljeničtvu i organizacijama iseljeničtva Bosne i Hercegovine najviše je priznanje koje bi Bosna i Hercegovina dodjeljivala za izuzetan doprinos u jačanju veza iseljeničtva sa Bosnom i Hercegovinom, u svrhu priznanja dosadašnjeg rada i podsticanja dalje saradnje sa Bosnom i Hercegovinom u različitim oblastima društvenog života.

Ovim se otvaraju i pitanja značajna za donošenje ove, a najvažnija se odnose na pravo na priznanje i oblasti u kojima se dodjeljuje priznanje. Shodno tome, smatramo da je važno da se priznanje dodjeljuje pojedincima i organizacijama iseljeničtva za značajne doprinose u jačanju veza sa Bosnom i Hercegovinom u sljedećim oblastima: privreda, nauka i obrazovanje, kultura i informisanje, profesionalni i amaterski sport, zdravstvo i socijalna zaštita, filantropske i dobrotvorne aktivnosti.

Ciljana grupa na koju se ova Odluka odnosi je iseljeničtvo Bosne i Hercegovine.

Naglašavamo da se ovim želi dati značaj i izraziti zahvalnost svima onima koji rade na jačanju saradnje sa Bosnom i Hercegovinom u različitim oblastima društvenog života, a što bi bila i neka vrsta motivacije za dalji rad i veći doprinos iseljeničtva razvoju Bosne i Hercegovine.

Ministarstvo poziva sve zainteresovane iseljenike i organizacije iseljeničtva Bosne i Hercegovine, kao i fizičke osobe i civilno društvo u Bosni i Hercegovini da učestvuju u postupku javnih konsultacija o prednacrtu Odluke o uspostavljanju kriterija i dodjeli priznanja za iseljenike i organizacije iseljeničtva iz Bosne i Hercegovine.

Proces Javnih konsultacija otvoren je **15 dana** od dana objavljivanja na web aplikaciji eKonsultacije i web stranici Ministarstva i traje **od 20.02.2018. godine do 07.03.2018. godine.**

Prijedloge i primjedbe na prednacrt Odluke o uspostavljanju kriterija i dodjeli priznanja za iseljenike i organizacije iseljeničtva iz Bosne i Hercegovine mogu se dostaviti i elektronskom poštom na sledeći **e-mail: ana.judi@mhrr.gov.ba**

PREDNACRT

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), a u skladu sa tačkom 3.5. Politike o saradnji s iseljeništvom ("Službeni glasnik BiH" broj: 38/17), Vijeće ministara Bosne i Hercegovine, na ____ sjednici, održanoj _____ 2018. godine, donijelo je

O D L U K U

O USPOSTAVLJANJU KRITERIJA I DODJELI PRIZNANJA ZA ISELJENIKE I ORGANIZACIJE ISELJENIŠTVA IZ BOSNE I HERCEGOVINE

Član 1. **(Predmet)**

Ovom Odlukom o uspostavljanju kriterija i dodjeli priznanja za iseljenike i organizacije iseljništva iz Bosne i Hercegovine (u daljem tekstu: Odluka) utvrđuju se pravo na priznanje, oblasti u kojima se dodjeljuje priznanje, kriteriji za dodjelu priznanja, postupak i način izbora i dodjele priznanja, izgled priznanja, vođenje evidencije o dodjeljenim priznanjima istaknutim pojedincima u iseljeništvu i organizacijama iseljništva porijeklom iz Bosne i Hercegovine i postupak oduzimanja priznanja.

Član 2. **(Cilj dodjele priznanja)**

Priznanje istaknutim pojedincima u iseljeništvu i organizacijama iseljništva Bosne i Hercegovine najviše je priznanje koje Bosna i Hercegovina dodjeljuje za izuzetan doprinos u jačanju veza iseljništva sa Bosnom i Hercegovinom, u cilju priznanja dosadašnjeg rada i podsticanja dalje saradnje sa Bosnom i Hercegovinom u različitim oblastima društvenog života.

Član 3. **(Definicija)**

(1) Iseljenici iz Bosne i Hercegovine i njihovi potomci su osobe koje vode porijeklo iz Bosne i Hercegovine, a koji žive izvan Bosne i Hercegovine i integrisani su u zemljama prijema, bez obzira na njihovo državljanstvo ili nacionalnu pripadnost i koji individualno ili kolektivno doprinose ili imaju interes da doprinesu promociji i sveukupnom društveno-ekonomskom razvoju Bosne i Hercegovine, te poboljšanju imidža Bosne i Hercegovine u svijetu.

(2) Organizacije iseljništva su organizacije koje okupljaju iseljništvo iz Bosne i Hercegovine iz stava (1) ovog člana, a koje svojim radom doprinose ili imaju interes da doprinesu promociji i sveukupnom društveno-ekonomskom razvoju Bosne i Hercegovine, te poboljšanju imidža Bosne i Hercegovine u svijetu.

Član 4. **(Pravo na priznanje)**

Priznanje se dodjeljuje istaknutim pojedincima, naučnim, stručnim i javnim radnicima, i organizacijama koje okupljaju iseljništvo Bosne i Hercegovine i daju poseban doprinos jačanju saradnje i veza iseljništva sa Bosnom i Hercegovinom.

Član 5.
(Oblasti u kojima se dodjeljuju priznanja)

(1) Priznanja se dodjeljuju u sljedećim oblastima:

- a) oblast privrede,
- b) oblast nauke i obrazovanja,
- c) oblast kulture i informisanja,
- d) oblast profesionalnog i amaterskog sporta,
- e) oblast zdravstva i socijalne zaštite,
- f) oblast filantropskih i dobrotvornih aktivnosti.

(2) Svake druge godine može se dodijeliti najviše šest (6) priznanja, iz svake oblasti po jedna, bez obzira da li se priznanje dodjeljuje pojedincu ili organizaciji.

(3) Priznanje se istoj osobi ili organizaciji, definiranim članom 3. i 4. ove Odluke može dodijeliti samo jedanput.

Član 6.
(Kriteriji za dodjelu priznanja u oblasti privrede)

Priznanja za doprinos u oblasti privrede dodjeljuju se za značajne doprinose ekonomskom razvoju, rezultate i zasluge postignute u svrhu:

- a) jačanja i unapređenja privrednog partnerstva sa BiH,
- b) saradnje sa poslovnom zajednicom BiH,
- c) promovisanja ekonomskih potencijala BiH,
- d) međunarodne promocije potencijala BiH u oblasti trgovine i direktnih stranih ulaganja,
- e) investiranja, investiranja u proizvodnju, investiranja u manje razvijena područja, visina ulaganja i broj novih radnih mjesta kao produkt ulaganja u BiH,
- f) prenosa znanja, vještina i tehnologija.

Član 7.
(Kriteriji za dodjelu priznanja u oblasti nauke i obrazovanja)

Priznanja za doprinos u oblasti nauke i obrazovanja dodjeljuju se za značajne doprinose, rezultate i zasluge postignute u svrhu:

- a) jačanja i unapređenja naučne i obrazovne saradnje sa BiH,
- b) promocije znanja i nauke,
- c) prenosa znanja,
- d) organizacije dopunskog obrazovanja djece,
- e) ostvarivanja izuzetnih rezultata u obrazovnim aktivnostima (rezultati učenika, vannastavne aktivnosti i sl.),
- f) očuvanja maternjih jezika,
- g) poboljšanja imidža Bosne i Hercegovine u svijetu.

Član 8.
(Kriteriji za dodjelu priznanja u oblasti profesionalnog i amaterskog sporta)

Priznanja za doprinos u oblasti profesionalnog i amaterskog sporta dodjeljuju se za značajne doprinose, rezultate i zasluge postignute u svrhu:

- a) jačanja sportske saradnje iseljenika sa BiH,
- b) promocije BiH na međunarodnom planu kroz posebna sportska ostvarenja,

- c) osnaživanju sporta u BiH,
- d) pomoći mladim talentima iz BiH.

Član 9.

(Kriteriji za dodjelu priznanja u oblasti kulture i informisanja)

Priznanja za doprinos u oblasti kulture dodjeljuju se za značajne doprinose, rezultate i zasluge postignute u svrhu:

- a) jačanja i unapređenja kulturne razmjene sa BiH,
- b) njegovanja i promocije kulturnog nasljeđa BiH,
- c) promocije kulturnog stvaralaštva BiH,
- d) očuvanja tradicije i kulturnih dobara BiH,
- e) ostvarivanja izuzetnih rezultata u oblasti kulture (novi kulturni sadržaji i sl.),
- f) razvoja i unapređenja oblasti informiranja,
- g) ostvarivanja izuzetnih rezultata u oblasti informisanja (novi programski sadržaji, objektivnost i blagovremenost u informiranju i sl.).

Član 10.

(Kriteriji za dodjelu priznanja u oblasti zdravstva i socijalne zaštite)

Priznanja za doprinos u oblasti zdravstva i socijalne zaštite dodjeljuju se za značajne doprinose, rezultate i zasluge postignute u svrhu:

- a) jačanja i unapređenja saradnje sa BiH,
- b) prenosa znanja i vještina,
- c) ostvarivanja izuzetnih rezultata u poboljšanju zdravstvene zaštite,
- d) unapređenja i razvoja socijalne i dječije zaštite,
- e) umrežavanja i doprinosa u radu zdravstvenih institucija i akademskog sektora.

Član 11.

(Kriteriji za dodjelu priznanja u oblasti filantropskih i dobrotvornih aktivnosti)

Priznanja za doprinos u oblasti filantropskih i dobrotvornih aktivnosti dodjeljuju se za značajne doprinose, rezultate i zasluge postignute u svrhu:

- a) pomoći kroz humanitarne akcije i dobrotvorni rad,
- b) volontiranja,
- c) doniranja opreme, sredstava i materijala.

Član 12.

(Javni poziv)

(1) Ministarstvo za ljudska prava i izbjeglice BiH (u daljem tekstu: Ministarstvo) na svojoj web stranici objavljuje javni poziv za dostavu prijedloga za dodjelu priznanja iz člana 5. ove Odluke.

(2) Pravo dostavljanja prijedloga imaju osobe starije od 18 godina, organizacije iseljenika, privredna društva, nevladine organizacije, udruženja i drugi pravni subjekti iz iseljeništva i Bosne i Hercegovine.

Član 13.
(Način predlaganja)

- (1) Prijedlog za dodjelu priznanja sadrži osobne podatke o kandidatu, odnosno naziv i sjedište organizacije koja se predlaže i vrstu priznanja. U obrazloženju se navode činjenice i dokazi o radu i angažiranju, postignutim rezultatima i uspjesima na osnovu kojih se može odlučiti o dodjeli priznanja.
- (2) Prijedlozi iz stava (1) ovog člana dostavljaju se Ministarstvu na obrascu Anex I, koji je sastavni dio ove Odluke.
- (3) Prijedlozi suprotni članu 5. stav (3) ove Odluke se neće uzeti u razmatranje i isti će biti odbačeni.

Član 14.
(Komisija za izbor)

- (1) Ministarstvo imenuje komisiju u roku od 15 dana od dana objavljivanja javnog poziva.
- (2) Komisiju čini sedam članova u čijem sastavu su dva predstavnika Ministarstva, i po jedan predstavnik Ministarstva vanjskih poslova BiH, Ministarstva civilnih poslova BiH, Ministarstva vanjske trgovine i ekonomskih odnosa BiH, Agencije za promociju stranih investicija BiH i Direkcije za ekonomsko planiranje BiH.
- (3) Komisija na prvoj sjednici bira predsjednika i zamjenika predsjednika i donosi Poslovnik o radu.
- (4) Poslovnikom o radu se, između ostalog, propisuje i tajnost rada Komisije za izbor i način vrednovanja pristiglih prijedloga.
- (5) Komisija razmatra pristigle prijedloge sa aspekta potpunosti, obrazloženja i dokumentacije i na osnovu kriterija propisanih ovom Odlukom, vrši vrednovanje doprinosa, rezultata i zasluga kandidata za koje je podnesen prijedlog, na osnovu čega se priprema rang lista sa prijedlogom kandidata za dodjelu priznanja.
- (6) Neblagovremeni, nepotpuni i prijedlozi bez obrazloženja se neće uzeti u razmatranje.
- (7) Komisija je dužna u roku od 21 dan od prijema prijedloga dostaviti ministru za ljudska prava i izbjeglice BiH rang listu kandidata, u pisanoj formi sa detaljnim obrazloženjem o vrednovanju kandidata u skladu sa propisanim kriterijima, s prijedlogom kandidata za dodjelu priznanja, u skladu sa članom 5. ove Odluke.
- (8) Komisija je dužna podnijeti izvještaj o radu ministru za ljudska prava i izbjeglice BiH, najkasnije u roku od 15 dana po sačinjavanju rang liste s prijedlogom kandidata za dodjelu priznanja.

Član 15.
(Odluka o dodjeli priznanja)

Na osnovu dostavljene rang liste s prijedlogom kandidata za dodjelu priznanja iz člana 14. ove Odluke od strane ministra za ljudska prava i izbjeglice BiH, Vijeće ministara BiH donosi odluku o dodjeli priznanja u skladu sa članom 5. ove Odluke.

Član 16.
(Dodjela priznanja)

- (1) Priznanja se dodjeljuju na posebno organizovanoj svečanosti svake druge godine, koju organizira Ministarstvo.
- (2) Priznanje dodjeljuje Vijeće ministara BiH.

Član 17.
(Javnost)

Na web stranici Ministarstva biti će objavljena lista dobitnika priznanja.

Član 18.
(Izgled priznanja)

(1) Priznanje za iseljenike je izrađeno na čvrstom papiru sa podlogom zastave Bosne i Hercegovine formata A4. U gornjem dijelu priznanja nalazi se logo Vijeća ministara BiH, a na sredini je velikim slovima ispisano "PRIZNANJE", ispod kojeg je velikim slovima ispisano ime i prezime osobe. Ispod toga piše vrsta priznanja iz člana 5. ove Odluke, u donjem lijevom uglu se nalazi broj i datum, a u donjem desnom uglu nalazi se potpis predsjedavajućeg Vijeća ministara BiH.

(2) Priznanje za organizacije iseljeničtva iz BiH je izrađeno na čvrstom papiru sa podlogom zastave Bosne i Hercegovine formata A4. U gornjem dijelu priznanja nalazi se logo Vijeća ministara BiH, a na sredini je velikim slovima ispisano "PRIZNANJE", ispod kojeg je velikim slovima ispisano naziv organizacije kojoj je priznanje dodijeljeno. Ispod toga piše vrsta priznanja iz člana 5. ove Odluke, u donjem lijevom uglu se nalazi broj i datum, a u donjem desnom uglu nalazi se potpis predsjedavajućeg Vijeća ministara BiH.

(3) Izgled priznanja iz stava (1) i (2) ovog člana prikazan je na crtežima Anex II koji je sastavni dio ove Odluke.

Član 19.
(Evidencija)

O iseljenicima, odnosno organizacijama iseljenika kojima su dodijeljena priznanja, Ministarstvo vodi evidenciju. Evidencija sadrži: oblast u kojoj je priznanje dodijeljeno, ime i prezime iseljenika, odnosno naziv organizacije kojoj je dodijeljeno priznanje, broj i datum odluke o dodjeli priznanja, datum i mjesto uručenja priznanja.

Član 20.
(Oduzimanje priznanja)

(1) Priznanje propisano ovom Odlukom može se oduzeti.

(2) Pod pojmom oduzimanje priznanja, u skladu sa stavom (3) i (4) ovog člana, podrazumjeva se oduzimanje priznanja iseljeniku ili organizaciji čiji je osnivač, predsjednik ili član uprave osuđen pravosnažnom sudskom presudom.

(3) Priznanje se oduzima u slučaju da je osoba kojoj je dodijeljeno priznanje ili osnivač ili predsjednik ili član uprave organizacije kojoj je dodijeljeno priznanje, pravosnažnom sudskom presudom osuđen za ratne zločine počinjene na teritoriju bivše Jugoslavije, ili koje je pravosnažnom sudskom presudom od strane bilo kojeg suda sa područja Bosne i Hercegovine osuđeno za krivično djelo protiv života i tijela, slobode i prava građana, dostojanstva osobe i morala imovine, pravosuđa, službene i druge odgovorne dužnosti, osnova društvenog uređenja i sigurnosti na kaznu zatvora od godinu dana i više.

(4) Nagrada se može oduzeti i u slučaju da je priznanje dodijeljeno osobi ili osnivaču ili predsjedniku ili članu uprave organizacije koji je pravosnažnom sudskom presudom osuđen na kaznu zatvora preko tri godine ili težu kaznu, a ne radi se o krivičnom djelu iz stava (3) ovog člana.

(5) Stav (3) i (4) ovog člana primjenjuju se i ako se radi o pravosnažnoj sudskoj presudi bilo kojeg suda izvan Bosne i Hercegovine, odnosno suda u zemlji prijema.

(6) Po saznanju ili prijavi, Ministarstvo pokreće postupak oduzimanja priznanja i prijedlog odluke o oduzimanju priznanja sa obrazloženjem dostavlja Vijeću ministara BiH.

(7) O oduzimanju priznanja odlučuje Vijeće ministara BiH.

Član 21.

(Finansiranje)

Za dodjelu priznanja za iseljenike iz Bosne i Hercegovine nisu potrebna dodatna finansijska sredstva.

Član 22.

(Provođenje Odluke)

Za provođenje ove Odluke zadužuje se Vijeće ministara BiH i Ministarstvo za ljudska prava i izbjeglice BiH.

Član 23.

(Stupanje na snagu)

Odluka stupa na snagu danom donošenja i objavljuje se u "Službenom glasniku BiH".

VM _____
_____2018. godine
Sarajevo

Predsjedavajući
Vijeća ministara BiH
dr. Denis Zvizdić, s.r.

OBRAZAC PRIJAVE
ZA DODJELU PRIZNANJA ISELJENICIMA I ORGANIZACIJAMA
ISELJENIŠTVA IZ BOSNE I HERCEGOVINE

Podaci o predlagatelju	
Ime i prezime fizičke osobe/naziv organizacije/pravne osobe	
Adresa prebivališta fizičke osobe/sjedište organizacije/pravne osobe	
Osoba ovlaštena za zastupanje organizacije/pravne osobe	
Kontakt telefon	
Email adresa	
Podaci o kandidatu	
Ime i prezime fizičke osobe/naziv organizacije	
Datum i godina rođenja fizičke osobe/datum i godina osnivanja organizacije	
Adresa prebivališta fizičke osobe/sjedište organizacije	
Kontakt telefon	
Email adresa	
Kategorija za priznanje	
Kategorija za koju se predlaže kandidat/organizacija: a) oblast privrede b) oblast nauke i obrazovanja c) oblast kulture i informisanja d) oblast profesionalnog i amaterskog sporta e) oblast zdravstva i socijalne zaštite f) oblast filantropskih i dobrotvornih aktivnosti (Upisati naziv kategorije na koju se odnosi prijedlog)	

Podaci o kandidatu

(biografija fizičke osobe/osnovni podaci o organizaciji)

Obrazloženje prijedloga

(postignuća i doprinosi zbog kojih se predlaže dodjela priznanja)

Napomena:

- Prijedlog mora biti potpisan ukoliko je predlagatelj fizička osoba, a ukoliko je predlagatelj organizacija ili pravna osoba, isti mora biti potpisan i ovjeren pečatom (ukoliko organizacija posjeduje pečat);
- Uz prijedlog se dostavlja dokumentacija kojom se potvrđuju navodi iz prijedloga.

Mjesto i datum

Potpis i pečat



BOSNA I HERCEGOVINA

Vijeće ministara

PRIZNANJE

IME I PREZIME

VRSTA PRIZNANJA

Predsjedavajući



BOSNA I HERCEGOVINA

Vijeće ministara

PRIZNANJE

NAZIV ORGANIZACIJE

VRSTA PRIZNANJA

Predsjedavajući

OBRAZLOŽENJE

I PRAVNI OSNOV

Pravni osnov za donošenje ove Odluke je sadržan u tački 3.5. Politike o saradnji sa iseljeništvom („Službeni glasnik BiH“, broj: 38/17) kojom je propisano da su zemlje s brojnim iseljeništvom ustanovile nagrade ili priznanja za različite doprinose iz iseljništva, da se predlaže da se razmotri slično uspostavljanje i u Bosni i Hercegovini, da se priznaju iseljenici kao važni faktori razvoja Bosne i Hercegovine, da bi se priznanja mogla dodjeljivati pojedincima i organizacijama za istaknuti angažman u određenoj oblasti, i to za zasluge/doprinose razvoju i promociji BiH, razvoju nauke, učenju maternjih jezika, prenošenju znanja ili općenito razvoju saradnje posebno ekonomske između iseljništva i BiH, te da će se isto regulisati posebnim propisom.

II RAZLOZI ZA DONOŠENJE ODLUKE

Ministarstvo za ljudska prava i izbjeglice BiH je zaduženo za provođenje aktivnosti iz tačke 3.5. Politike o saradnji sa iseljeništvom.

Smatramo da je važno da se priznanje dodjeljuje pojedincima i organizacijama iseljništva za značajne doprinose u jačanju veza sa Bosnom i Hercegovinom u oblastima: privrede, nauke i obrazovanje, kulture i informisanje, profesionalnog i amaterskog sporte, zdravstva i socijalne zaštite, filantropskih i dobrotvornih aktivnosti.

Ovim se želi izraziti zahvalnost svima onima koji rade na jačanju saradnje sa Bosnom i Hercegovinom, a što bi bila i neka vrsta motivacije za dalji rad i veći doprinos iseljništva razvoju Bosne i Hercegovine.

III OPIS PRETHODNIH KONSULTACIJA VOĐENIH U PROCESU IZRADE ODLUKE

Ministarstvo za ljudska prava i izbjeglice BiH je prije izrade same odluke tražio mišljenje i prijedloge za oblasti u kojima bi se dodjeljivala priznanja i kriterije za dodjelu istih od sljedećih institucija:

- Ministarstva vanjskih poslova BiH,
- Ministarstva civilnih poslova BiH,
- Ministarstva vanjske politike i ekonomskih odnosa BiH,
- Agencije za unapređenje stranih investicija u BiH
- Direkcije za ekonomsko planiranje BiH,

te je sve prijedloge prethodno navedenih institucija unijela u predmetni dokument.

IV FINANSIRANJE

Za realizaciju aktivnosti iz ove Odluke nije potrebno osigurati dodatna finansijska sredstva.